

SAVOGNIN: exposiziun «eMobil»

## Digl auto anfignen tar igl velo

**G.N.S.** L'exposiziun stat sot igl motto: eir cun current e tancar forza solara. Tar l'occurrenza segl areal dalla Uffer SA sa tracta tot dalla «e-mobilitad». A disposiziun stattan a mintgign per en viadi d'amprova gist 20 autos e vehichels tgi von cun current regenerabel.

An dus emdas ò li a Savognin ena occurrenza tgi sa drezza a tots chels tgi on interess da neir tar infurmaziuns interessantas dad autos e vehichels tgi von cun current e forza regenerabla. Igl visitaders on betg angal la caschung da far viadis da prova cun plessas marcas dad autos tgi sa movan cun electric, mabagn vign mintgign er cunsiglia da persungas digl rom e da spezialists dall'energeia regenerabla. Igl intent dalla exposiziun è alloura er da mussar la produziun da current solar, da trer chel a nez e cunzont er igls avanzats da chella energeia regenerabla.

### La «ela energiewelt»

Tiers tgi igls «protagonists» dall'occurrenza èn bagn igls vers 20 autos e vehichels tgi von per veia sainza gronda canera, mantga er betg l'infurmaziun per tots chels tgi lessan saveir duple digl potenzial economic, ecologic e dall'energeia regenerabla, cun biagier ena tgesa u en oter object. La «ela energiewelt» è an chella tgossa an mintga cass en partenari serious e cun ena buna experientscha. Igl madem vala alloura er per igls partenaris da chella organisaziun, la Uffer SA, igl «ewz», la «ibw» ed igl Parc Ela. Sa tgapescha



Segl areal dalla Uffer SA a Savognin ò li l'exposiziun organisada dalla «ela energeia».

tgi er chels quatter partenaris èn dalla partei-da agl de digl «eMobil».

### Audi-BMW-VW-Nissan

Chegl èn quatter dallas marcas dad autos electric tgi stattan a disposiziun agls visitaders per far en gir. Iniziants digls autos tgi von cun current èn stos igls Asiats e las ampremas marcas dad autos tgi von cun current eran er dall'Asia. Oz produtgeschan pero er igls gronds concerns dad autos

dall'Europa scu Audi, BMW e VW autos tgi von cun electric. Igl madem ins dastga er deir dallas dus marcas dad autos franzosas Renault e Peugeot. La Thomann SA da Coira expone er models da «Streetscooters» ed ena rarietad expone Reto Schircks da Stierva, en schinummo «Puch Haflinger», tgi el ò biagia anturn tar en vehichel tgi vo cun current. En bela collecziun da velos «e-bikes» preschainta alloura Sport Wasescha da Savognin igls 14 d'otgover 2018 segl areal dalla Uffer SA.

### Ulteriours expositours

L'exposiziun cumpletteschan anc nov menaschis tgi on an ena u l'otra furma er da far ensatge cun energeia. Tranter oter èn chegl igl «ewz» Turitg, «eternit» Niederurnen, «l'emobile» Fehraltorf, la «Hassler Energeia, Zirang e la «Vassella Energie GmbH», Poschiavo. L'antiera exposiziun vign er sustigneida digl Uffezi d'energeia e traffic digl cantun Grischun.

### Dallas 10.00–16.00

La «e Mobil Expo» ò li igls 14 d'otgover 2018 a Savognin segl areal dalla Uffer SA. L'exposiziun vo dallas 10.00 anfignen allas 16.00. I dat er en travagl d'ustareia, pussebel è er da construir en model dad en auto solar. Alla curta vignan er betg igls infants.



Autos tgi von cun current scu chel digl Parc Ela èn exponias.